



8. Tschanteda da la suprastanza cumünela in marculli, ils 1.5.2019 a las 19.30 in chesa cumünela S-chanf

Presidi: Gian Fadri Largiadèr

Preschaints: Liun Quadri

Suppleant: Linard Luzi

Absaints: Paolo Bernasconi, Mario Mammoliti, Roman Parli

Actuar: Gian Luca Vitalini

Tractandas:

1. Protocol
2. 0.205 Rendaquint 2018 prüma lectüra
3. 0.211 Dumandas da fabrica
4. 0.110 Ordinaziun da trafic
5. 0.209 Pusiziun cunvegna da prestaziun culla Regiun Malögia
6. 8.160 Cumpra d'ün mantuneder per la resgia
7. 8.100 Surdeda da lavuors tagl God God
8. 3.000 Dumandas da contribuziun
9. 8.300 Recuors cunter la taxa per la promuziun dal turissem
10. 9.999 Varia

La glista da tractandas vain approveda sainza objecziuns.

Protocol da decisiun

Protocol: Il protocol da la tschanteda dals 10 avrigl 2019 vain approvu unanimamaing.

Persunel:

Anita Kohler vain la nouva chanzlista da la vschinauncha da S-chanf. Sül 01. lügl 2019 do que üna roschada i'l administraziun cumünela. Scu successura da Gian Luca Vitalini es gnida tscherinda duonna Anita Kohler. La suprastanza cumünela es persvasa, d'avair chatto cun duonna Anita Kohler üna persuna fich verseda scu mnedra da l'administraziun. La duonna da 50 ans, e l'Engiadina scu patria tschernida, ho lavuro i'ls ultims 18 ans tal departamaint federel dals affers esters (EDA) scu consula in differents pajais. La specialista d'administraziun publica maina vastas cugnuschentschas da linguas e experienzas sül champ da lavur cun se, e s'allegra sülla nouva sfida. Il perfecziunamaint da l'administraziun spetta ella cun grand interess e cumainza sias lecziuns da rumauntsch già bainbod. Gian

Luca Vitalini lavura sper l'introducziun da la nouva chanzlista in differentas spartas da l'administraziun cumünela in ün pensum limito.

**66 0.205 Rendaquint/planisaziun da finanzas
Rendaquint 2018 prüma lectüra**

Il contabel ho preparato la prüma versiun dal rendaquint 2018. La suprastanza cumünela ho piglio cugnuschentscha da la prüma lectüra dal rendaquint 2019. Impü decida la suprastanza cumünela unanimamaing da sbasser ils fits calculatorics da 3% scu fin co sün 1.5%.

67 0.211 Dumanda da fabrica

19.08, sbudeda e renovaziun/ingrandimaint chamanna Arsüras, parc. nr. 479

La suprastanza cumünela decida unanimamaing d'aderir la dumanda da fabrica.

19.10, curuna cuvrída, Serlas, parc. nr. 701

La suprastanza cumünela decida unanimamaing d'aderir la dumanda da fabrica.

19.11, müdamaints halla B, Serlas, parc. nr. 814

La suprastanza cumünela decida unanimamaing d'aderir la dumanda da fabrica cun resalvas.

19.06, pompa da chalur, parc. nr. 140 e 581, Chauntaluf, S-chanf

La suprastanza cumünela decida cun 2 cunter 1 vusch da refüser la dumanda regard ils panels da fotovoltaic in connex cul aspectt dal lö. Impü decida la suprastanza cumünela unanimamaing d'aderir la sondagia da prouva.

S-chela da peschs serra da Vallember

Ad es previs da fer üna nouva s-chela da peschs tar la serra da Vallember. Quist proget gnis realiso da las OEE. Our dal motiv chi vain druvo per quista chosa terrain public ho la vschinauncha da S-chanf il dret d'udida.

La suprastanza cumünela piglia cugnuschentscha da la documainta da la s-chela da peschs per la serra da Vallember cun la pussibiltad da recurer fin ils 04 gün 2019.

Tscherna commember per la cumischiun da fabrica per ün affer

La suprastanza cumünela tscherna a Liun Quadri scu commember da la cumischiun da fabrica per pudair examiner la dumanda da fabrica Chesa 37, Smovih. Causa cha'l depüto Mario Mammoliti es imbarrazo ed il commember da la cumischiun Christian Pinggera involvo cun l'affer in quista fatschenda e nu po tres que neir piglier part, es gnieu tschernieu il suppleant dal decasteri da fabrica Liun Quadri in la cumischiun da fabrica per pudair tratter quista dumanda da fabrica leghelmaing güst.

**68 0.209 Contrats e cunvegnas
Pusiziun cunvegnas da prestaziuns culla Regiun Malögia**

Il böt es da pudair cuntinuer cullas cunvgenas da prestaziuns traunter la Regiun Malögia e las vschinaunchas. Las cunvegnas stipuledas traunter las vschinaunchas e la Regiun Malögia sun ils prossems ans do liber per la desditta (finischiun 2020 fin la fin 2023). Las vschinaunchas vegnan dumandadas, schi sun avaunt maun objecziuns u giavüschs da desdittas dals singuls contrats.

La suprastanza cumünela decida da cuntinuer cun las cunvegnas da prestaziun scu fin co.

**69 8.160 Resgia
Cumpra d'ün mantuneder per la resgia**

Per pudair servir il deposit da laina illa nouva halla da deposit e las curunas dadourvart esa necessari d'avair ün mantuneder. l'import per il mantuneder es previs aint il proget e fat bun da la radunanza cumünela ils 04.10.2017. I sun gnieu piglio aint duos differentas offertas. Tenor il depüto e'l silvicultur vain fatta la proposta da cumprar il mantuneder tar la firma Gebert AG a Eschenbach SG per fr. 64'620.00 inclus isp. e'l transport.

La suprastanza cumünel decida unanimamaing da cumprar il mantuneder tar la firma Gebert AG da Eschenbach SG per fr. 64'620.00 inclus isp. e'l transport.

**70 8.100 Forestel
Surdeda da lavuors tagl God God**

Quist inventar da god es scu pascul da god fich important scu pascul da prümavaira e d'utuon. Per amegldrer la qualited scu pascul vain il nummer da bös-chs schmezzo per pudair garantir ün pascul frütaivel e listess mantgnair la funcziun dal god. Per pudair lavurer effiziant e economic es tar quist tagl da racolta favuraivel, sch'üna ditta cun maschinas po fer la lavur. I sun gnidas pigliedas aint trais offertas tar ün'imsüra da 900m³. Il depüto e'l silvicultur propuonan da surder la lavur a la firma Ferrari per fr. 42'500.00 exclus isp..

La suprastanza cumünela decida cun 2 cunter 1 vusch da surder la lavur a la firma Ferrari per fr. 42'500.00 exclus isp..

**71 3.000 Cultura
Dumandas da contribuziun**

Rimplazzamaint da la maschina da fer loipas

Per pudair mantgnair la preparaziun da la loipa da passlung illa Plaiv voul que üna nouva maschina per fer la pista (Snowmobil). L'ideja füss da cumprar ün veicul a tschintun, chi's po eir druver da sted sülla piazza da golf. Ils cuosts vegnan spartieus sü sün las vschinaunchas da la Plaiv e'l Golf Engadin. La part finanzia la per la vschinauncha da S-chanf s'amunta sün fr. 5'625.00.

La suprastanza cumünela decida unanimamaing da contribuir vi da la maschina per fer loipas (Snowmobil) fr. 5'625.00.

Dumanda da contribuziun Freestyle WM 2025

Illa tschanteda da la suprastanza cumünela dals 13 marz 2019 es gnieu decis da refüser la documainta inoltreda dal comité d'organisaziun per aunch'üna vouta surlavurer il dossier

per pudair suottametter a la radunanza cumünela üna proposta detaglieda. Il comitè d'organisaziun ho surlavuro la dumanda da finanziaziun e spiego quella cullas infuormaziuns necessarias a la conferenza da presidents ils 18 avrigl 2019. Impü sustegna l'ESTM AG quist'intenziun. A vain fatta la pretaisa da las vschinaunchas da l'Engiadin'Ota, cha'l chantun Grischun e la confederaziun as participeschan minchün cun fr. 4 miu.. La part da S-chanf importa bundant fr. 125'000.00. Quista dumanda vain suottamissa ad üna radunanza cumünela. Quista fatschenda gniss be aderida, scha tuot las vschinaunchas da l'Engiadin'Ota aderischan la dumanda, e las contribuziuns dal chantun e la confederaziun sun dedas.

La suprastanza cumünela decida unanimamaing da suottametter quista fatschenda ad üna prosma radunanza cumünela.

Ulteriuras dumandas da contribuziun

La suprastanza cumünela aderischa seguintas dumandas da contribuziun:

- Concours Hippique San Murezzan cun fr. 600.00.
- SwissAlpine Irontrail (occurenza da cuorrer) cun fr. 300.00.
- Brassweek a Samedan cun fr. 200.00
- Posta Ladina (archiv digitel) cun fr. 500.00
- Inscunter da tractors ed oldtimers cun fr. 300.00
- Musica da S-chanf sustegn finanzia per la cumpra d'üna unifurma cun fr. 2'000.00

72 8.300 Turissem e cura Recuors cunter la taxa per la promuziun dal turissem

In vschinauncha sun entros divers recuors cunter la taxaziun per la promuziun dal turissem. La suprastanza cumünela discutta sur la realisaziun da quista ledscha tes l'administraziun cumünela e constatescha, cha divers puncts da quista ledscha sun melinclegiantaivels e per part tradüt insufficiaint illa lingua rumauntscha. Impü piglia la suprastanza cumünela cugnuschentscha, cha la cumischiun revaisa tschantamaints, ledschas ed uordens da la vschinauncha da S-chanf es vi da la surlavuraziun d'üna revaisa da la ledscha. Id es giavüsabel, ch'üna revaisa da quista ledscha vain auncha glivreda quista an per pudair realiser in futur üna leschda pratichabla.

La suprastanza cumünela decida unanimamaing d'accepter tuot ils recuors.

73 9.999 Varia

La suprastanza cumünela piglia cugnuschentscha:

Invid per la radunanza generela da la Repower AG a Puntraschigna.

Charta d'infurmaziun da la Viafier retica regard lavuors da mantegniment da La Punt fin Susch dals 06 meg 2019 fin la fin da l'an.

Infuormaziuns davart da la tschanteda da cussagl administrativ da l'ESTM.

Per pudair glivrer respectivamaing cuntinuer cun fatschendas chi sun daspö lönch aviertas, vain giavüscho dal depüto Liun Quadri da preparar seguintas fatschendas per la tschanteda da la suprastanza cumünela ils 05 gün 2019:

- Variantas e evaluaziun da finanzas per üna cuntinuaziun dal büro da turissem ESTM i'l administraziun cumünela.

- Preparaziun da la actas per las trattativas Armasuisse – vschinauncha – Bos-chetta Plauna (lingia d’ova e reservuar Bügls – Murtiröl, via d’access Bos-chetta Plauna, schlargiamaint da la deponia parcella parziela nr. 305)

Impü vain il mneder da proget e mneder da fabrica Liun Quadri supplicho da fer üna glista detaglieda da las lavuors na auncha glivredas cun terminaziun fin il pü tard ils 27 meg 2019, da seguaints progets:

- Proget quartier Chapella – finischiun utuon 2019
- Lavuors d’infrastructura Bos-chetta Plauna (transferimaint lingia d’ova persa) – finischiun utuon 2019
- QS provedimaint d’ova – finischiun utuon 2019

Ils suprastants piglian cugnuschentscha da las absenzas da vacanzas dal president (06.05. – 20.05.2019) e dal chanzlist (13.05. – 26.05.2019). La votumaziun federela ils 19 meg 2019 vain mneda da duonna M. Thom.

A las 22.05 vain la tschanteda alveda.

In buna fè

Il president:

L’actuar:

G. Largiadèr

G.L. Vitalini